

2

und erscht no Sponsor-Stützi schwinze.
Wer weiss, wenn die Zwei sich verstönd,
dass au en Zitigs-Nochwuchs wönd,
wo's schöppele chönd, vo vorn bis hine
mit «Wiler-Nochricht OVO-Maltine».

Em Carlo isch glaub höchstwohrscheinlich
bald jede Fasnachtsscherz scho pinlich,
drum find er's masslos übertribe
das, was der Kari Hölzli gschribe.
Schlussendli sind's denn bald sowit,
dass jede d'Schuld am andre git.
Doch s'Volk, das weiss bis hüt no nöd
wieso, worum und wer, dass blöd.
Ich möcht dezue em Carlo säge
und hoff, do heb er nünt degäge:
«Worum verschenksch du Sympathie?
Spiel gschider dini «Semphoniä»
und wunderschöni schrägi Fuge,
du usrangierti, alti Guge.»

3

Kulturpris find ich gar nöd schlecht.
Doch zwei uf's Mol, i weiss nöd recht.
Was hätt d'Theatergesellschaft denkt,
wo ein dezue e Cherze g'schenkt?
Grad no verziert, mit Namesschildi
und chline Prominentebildli.
Worum hend's ächt i därä Nacht
zom Chertzli Prozessionli gmacht?
De Frömmescht vo allne, glaub' ich bald,
isch gsi de Richi Osterwald.
Sit do weiss nämlich jedes Chind,
was echti Ostercherze sind.

7

20 Kilometer Kabelstrang,
6 Kameras, 16 Monitore,
Computer-gstürti Generatore,
wo d'Stromversorgig garantiert.
Und, dass bim Ton kein Seich passiert,
es Pult mit Tuusige vo Tasche
im Usmass vomene Kleiderchaschte.
S'hätt eifach alles, s'isch en Hit.
Nur cheibe schad, dass keine git,
wo wirklich weiss wie's funktioniert.
Ich ha scho längschstens resigniert
und gseit, «Schatz mach mi nöd verrückt.
Wird je emol am Chnöpfli druckt,
wo s'Bild erschint vom LTV,
denn reich' ich sofort d'Scheidig i.»

S'St.Peter Friedhofareal
isch blüemli-, bäumlilos und kahl.
Drumm hend's is Gschaltigs-Grossprojekt
mängs Hunderttusig Franke gscheckt.
Doch plötzlich isch, wie mir vernoh,
s'Problem vom Coop Parkplatz cho.
Denn lut Vertrag, chönd's näbscht de Chile
bald uf en Autofriedhof schile.
Und anstatt mit em Wiehrauchduft
verpesched's üs no d'Frühmessluft.
Schlussendli, wenn's mönd d'Schibe wäsche,
tönd's mit de leere Coop-Fläsche
und i de Hand s'Reklamefähnli
s'Wiehwasser useloh am Hähnli.
Wenn das passiert, de Parkplatz stoht,
muess jede, wo i d'Chile goht
uf d'Stirn, scho wäg sim Seeleläbe,
e Vatikan-Vignette chläbä.